

ኢብራዌ ኣሳሰ ፃፊቲዳ ኪታ ጋሳ ቆፋ

ሃ ኪታይ ፃፊቲዳይ፣ ዎልቃማ ሜቶይ ጋኪን፣ ባንታ ኣማኑዋ ኣጋናው ማቲዳ ኣማኒያ ኣሳሳ። ሃ ማፃፋ ፃፊይ፣ ዩሱስ ኪሪስቶስ ወርሴላኔ ቱማ ያሳ ቆንጩላ ጊዳይሳ ኢብራዌ ኣሳሰ ቤሴስ። ሄ ኣማኒያ ኣሳይ ባንታ ኣማኑዋን ሚናና ሜላ ኤንታ ሚንፊሴስ። ኢ ሄሳን ሄቩ ኣይፌ ቆፋታ ዋናዩዲ ቤሴስ።

1. ዩሱሲ ባ ኤኪዳ ሜቱዋን ኣዋሰ ቱማ ኪቴቲዳ ሜሪና ያሳ ናዓ። ኢ ያሳ ናዓ ጊዲዳ ጊሾ ጋልዓ ጫቁዋ ዎዴ ዴዒያ ናቤታፔ፣ ኪታንቸታፔ ሙሴፔ ቦላ።
2. ዩሱሲ ጋልዓ ጫቁዋ ካሂንታፔ ዳሮ ኣጲያ ሜሪና ካሂኔ ጊዳይሳ ያሳይ ባ ሁዒን ማርካቲስ።
3. ዩሱሳ ባጋራ ኣማኒያ ኣሲ ናጋራፔ፣ ያሻፌኔ ሃይቆፔ ኣቴስ። ዩሱሲ ካሂኔ ሃላቃ ጊዳይሳዳ፣ ካሴ ኢብራዌታ ኣማኖ ዎጋኒኔ ሜሄ ያርሾን ኩያዳ ቤንቲያ ኣቶቴላ ሃዒ ቱማ ኣሊስ።

ፃፊይ ኢሰራዒሌ ኣሳ ታሪኩን ዳሮ ኤሬቲዳ ኣሳ ኣማኖ ለሚሶ ኦሊ ኤኪዲ (ሼም 11) ሃ ማፃፋ ናባቢያ ኣሳቲ ባንታ ኣማኑዋን ሚናና ሜላ ኣኬኪሴስ። ሄሳዳካ፣ ሼም 12 ናባቤይሳቲ ባንታ ኣይፊያ ዩሱሳ ቦላ ዎሊዲ፣ ባንታ ኣማኑዋን ሚናና ሜላኔ ኣይ ሜቶይኔ ዎዩይ ጋኪኮካ፣ ኤንቲ ፔንጫና ሜላ ዘሬስ። ወርሴላን ዘሬኒኔ ኣኬኪሶ ቃላን ባ ኪታ ኩዩስ።

ኢብራዌ ኪታ ኣይፌ ቆፋታ

- ጌሎ ቆፋ፣ ያሳይ ኪሪስቶሳን ቆንጪዳይሳ 1:1-3
- ኪሪስቶሲ ኪታንቸታፔ ቦላ 1:4-2:18
- ኪሪስቶሲ ሙሴፔኔ ኢያሱፔ ቦላ 3:1-4:13
- ኪሪስቶሳ ካሂኔቴላይ ቦላ 4:14-7:28
- ኪሪስቶሳ ጫቆይ ቦላ 8:1-9:22
- ኪሪስቶሳ ያርሾይ ቦላ 9:23-10-39
- ኣማኖ ባይራቴላ 11:1-12:29
- ያሳ ኡፋይሶ 13:1-19
- ኣንጅኔ ኩሻ ቆፋ 13:20-25

ናዓይ ኪታንቸታፕ ቦላ

1 ካሴ ያሳይ፥ ኑ አዋታሰ ናቤታ ባጋራ ዲማ ዲማ ኦጌን ዳሮ ዋዴ ኦዲሰ። 2 ሺን ሃ ወርሴላ ዋዲያን ኡባ ኢያ ላቲሲዳ ቃሲ አላሚያ ኢያ ባጋራ ሜዲዳ ባ ናዓ ባጋራ ኑሰ ኦዲሰ። 3 ናዓይ ያሳ ቦንቸዋ ጳሌላኔ ኩሜላ ያሳ ያሳቴላ ኤኪዲ፥ ባ ዋልቃማ ቃላን ሃ አላሚያ ካቲሲዲ ኦይኪሰ። አሳ ኤንታ ናጋራፔ ጌሺዳፔ ጉዬ ኡባፌ ቦላ ያሳ ኡቫቻ ባጋን ሳሉዋን ኡቲሰ።

4 ኢያው ኢሜቲዳ ሱንላይ ኪታንቸታ ሱንላፌ ቦላ ጊዴይሳዳ ኢ ኤንታፌ ቦላ። 5 ሂዛ፥ ያሳይ ኪታንቸታፕ ኦዴኮ፥

«ኔኒ ታ ናዓ፤
ታ ሃቺ ኔው አዋ ጊዳሰ» ጊዴ?
ዋይኮ ቃሲ ኦዴኮ፥
«ታኒ ኢያው አዋ ጊዳና፤
ኢካ ታው ናዓ ጊዳና» ጊዴ?

6 ቃሲ ያሳይ ባ ባይራ ናዓ ሃ አላሚያ ኪቲሼ፥
«ያሳ ኪታንቸቲ ኡባይ ኢያው ጎይኖ»
ያጊሰ። 7 ያሳይ ኪታንቸታባ ኦዲሼ፥
«ያሳይ ባ ኪታንቸታ ጫርኮ፥
ባ አይሌታ ታማ ላጮ ኦሌሰ»

ያጊሰ። 8 ሺን ባ ናዓባ ኦዲሼ፥
«ያሳው፥ ኔ ካዋቲላይ ሜሪናው ዴዔሰ።
ኔ ካዋቲላ ኔ ዲሎቲላን አይሳሳ።

9 ኔኒ ዲሎቲላ ደሳዳሳ፤ ኢታ ኢዳዳሳ።
ያሳይ፥ ኔ ጎዳይ፥ ኔና ኔ ላጌታፔ አሊዲ ደሪሰ።
ኡፋይሳ ዛይቴ * ኔና ቲዩሰ»

ያጊሰ። 10 ያሳይ ዛሪዲ፥
«ጎዳው፥ ኮይሮ ኔኒ ሳዓ ሜዳዳሳ፤
ሳሎቲ ኔ ኩሼ ኦሶ።

11 ሄሳቲ ኡባይ ዳያና፤
ሺን ኔኒ ዳና።
ኤንቲ ኡባይ አፊላዳ ዉራና።

12 ኔኒ ኤንታ ሳሌናዳ ዓፃና፤
ቃሲ ኤንቲ አፊላዳ ሳሜታና።

1:5 ማዝ 2:7፤ 2ሳው 7:14፤ 1ታሪ 17:13 1:6 ዛሬ 32:43 1:7 ማዝ
104:4 1:8 ማዝ 45:6-7 * 1:9 ኡፋይሳ ዛይቴ፥ ኢ ካዋቲያ ዋዴ አሳይ
ኡፋይሳን ኢሊሊዲ ኢያ ካዋሌሳ ቤሴሰ። 1:10 ማዝ 102:25-27

ሺን ኔኒ ኡባ ዎዴ ኔና፤
ኔ ላይላይካ ዉሪና»

ያጌሰ። 13 ሺን ያሳይ ኪታንቸታፕ ኦዴኮ።

«ታኒ ኔ ሞርኬታ ኔ ቶሆይ

ዬዲያሶ ኦላና ጋካናው።

ሃይሳን ታፔ ኡሻቻ ባጋን ኡታ» ጊዴ?

14 ኪታንቸታ ኡባይ ኣቶቴሊ ዴማናው ዴዲያ ኣሳታ ማዳናው ያሳይ ከቲዳ ኣያናታ ጊደኮናዬ?

2

ጊታ ኣንጀዎ

1 ሄሳ ጊሾ፣ ኑኒ ሲዲዳ ቱማፔ ሃራሶ ኤኬቶና ሜላ ሄ ሲዲዳይሳ ሚንሊዲ ናጋናው ቤሴሰ። 2 ሂዛ፣ ኪታንቸታ ባጋራ ኦዴቲዳ ቃላይ ቱማ ጊዲኮ፣ ኢያ ናቆይኔ ከቲቶና ኢያይ ፐርዳ ኤሂያባ ጊዲኮ። 3 ያቲን፣ ኑኒ ሃይሳ ሜላ ጊታ ኣቶቴላ ኢፃሰ ጊኮ፣ ዋኒዲ ኣታኔ? ኮይሮ ጎዳይ ባ ሁዔን ሄ ኣቶቴላ ኦዲሰ፤ ቃሲ ኢያፔ ሲዲዳይሳቲ ኑሰ ጌሺዲ ማርካቲዶሶና። 4 ቃሲ ያሳይ ማላታታን፣ ኦራላባታን፣ ዲማ ዲማ ማላታኒኔ ባ ሼኒያዳ ኢሚዳ ጌሻ ኣያና ኢሞታታን ማርካቴላ ሚንሊሰ።

ዬሱሲ ኣሴ ጊዲሰ

5 ያሳይ ሃ ኑኒ ኦዲያ ሲንላፌ ያና ኣላሚያ፣ ኪታንቸታሰ ሃሪሲቤና። 6 ጌሻ ማፃፋይ ኢሲ ቤሳን ሃይሳዳ ያጌሰ።

«ኔኒ ኣሳሰ ቆፓናው ኣሲ ኣይቤ?

ዎይኮ ኔኒ ኢያ ናጋናው ኢ ኣይቤ?

7 ኔ ኢያ ኪታንቸታፕ ጉላ ዎዴሰ ጉላዳሳ፤

ኢያ ሁዔን ቦንቸኔ ሳባ ካላቻ ዎላዳሳ።

8 ቃሲ ኡባባ ኢያ ቶሁዋፔ ጋርሳን ዎላዳሳ»

ያጌሰ። ያሳይ ኡባባ ኢያው ሃሪሲያ ዎዴ ኢያው ሃሬቲቦናባይ ኣይቤካ ባዎ። ሺን ሃዲ ኡባባይ ኢያው ሃሬቲሺን ኑኒ ቤዲቦኮ።

9 ሺን ኑኒ ኪታንቸታፕ ጉላራ ጉዲዳ ዬሱሳ ቤዎሰ። ያሳ ኣጵ ኬሃቴላ ጋሶን ዬሱሲ ኣሳ ኡባሰ ሃይቂሰ። ኢ ዎዬ ሃይቆ ሃይቂዳ ጊሾ ቦንቸኔ ሳባ ካላቻ ኢያ ሁዔን ዎሊሰ። 10 ኡባባይ ኢያዉኔ ኢያ ጋሶን ሜዴቲዳ ያሳይ፣ ዳሮ ናይታ ባራ ቦንቸሳናው ኤንታ ኣቶቴላ ሁዲያ፣ ዬሱሳ ዎዬን ፖሎ ኦላናው ኢያው ቤሴሰ።

11 ዩሱሲኔ ሄ ኢ ጌሺዳ አሳ ኡባይ ኢሲ አዋ ናይታ። ዩሱሲ ኤንታ። «ታ አሻታ» ጊዲ ዪጋናው ዩላቶናይ ሄሳሳ። 12 ዩሱሲ፣ «ታኒ ኔ ሱንሳ ታ አሻታሰ አዋጃና፤

ዳሪያ ሸቁዋን ኔና ጋላታና» ያጌሰ። 13 ቃሲ ኢ፣ «ታኒ ታ አማኑዋ ኢያ ቦላ ዋላና» ቃሲካ፣ «የሳይ ታው ኢሚዳ ናይታራ ታ ሃይሳን ዳዓይሰ» ያጌሰ።

14 ናይቲ አሾይኔ ሱሌ ዳዔይሳታ ጊዲያ ጊሾ ዩሱሲካ ኤንታዳ አሴ ጊዲሰ። ኢ ሄሳ አሌዳይ፣ ሃይቆ ቦላ ዋልቂ ዳዔያ ፃላሂያ ባ ሃይቁዋን ቆይሳናሳ። 15 ቃሲ ባንታ ዳያ ላይላ ኡባን ሃይቆ ያሻን አይሌተዲ ዳዔይሳታ አይሌቴላፌ ዋዛናሳ።

16 ቱማ ዩሱሲ ዩዳይ ኣብራሃማ ዜሬሌ ማዳናሳፌ አቲን ኪታንቸታ ማዳናሳ ጊዳና። 17 አሳ ናጋራይ አቶ ጌቲታና ማላ ያሳ ሲንላን ማሪያኔ አማኔቲዳ ካሂኔ ሃላቃ ጊዲሰ። ሄሳ ጊሾ፣ ኢ ኡባባን ባ አሻታ ዳናናው ቤሴሰ። 18 ኢ ባ ሁዔን ፓጩን ዋዩቲዳ ጊሾ ፓጩቴይሳታ ማዳናው ዳንዳዔሰ።

3

ዩሱሲ ሙሴፔ ቦላ

1 ሄሳ ጊሾ፣ ያሳይ ዪጊዳ ጌሻ አሻቶ፣ ኑ አማኖን ጎዳ ጊዲ ዪጊያ ሃዋሪያኔ ካሂኔ ሃላቃ ዩሱሳ ቤዒቴ። 2 ሙሴይ ያሳ ኬላ ኡባን አማኔቲዳይሳዳ ዩሱሲካ ባና ዶሪዳ ያሳሰ አማኔቲዳይሳ። 3 ኬሌ ኬዔይሲ ኬላፌ አዲዲ ቦንቼቴይሳዳ ዩሱሲ ሙሴፔ አዲያ ቦንቸ ኤካናው ቤሴሰ። 4 ኢሲ ኢሲ ኬላ ኬዔዳ አሲ ዳዔሰ። ሺን ኡባ ጊሲሲዳይ ያሳ። 5 ሙሴይ ያሳ ኬላ ኡባን አማኔቲዳ አይሌ ጊዲዲ፣ ያሳይ ሲንላፌ ጋናባሰ ማርካ ጊዲሰ። 6 ሺን ኪሪሰቶሲ ያሳ ኬላን ናዒዳ አማኔቲዳይሳ። ኑኒ ኤካና ጊዲ ናጊያ ኡፋይሳ ሚንሊዲ ናጊኮ ያሳ ኬሌ ጊዳሰ።

ያሳ አሳሰ ዳዔያ ሸምፑዋ

7 ሄሳ ጊሾ፣ ጌሻ አያናይ ጌይሳዳ፣ «ሃቺ ሂንቴ ያሳይ ጌይሳ ሲዒያ ዋዳ 8 ባዞ ቢታን ፓጩያ ጋላሰ፣ ሂንቴ አዋቲ ማካሊዳይሳዳ፣ ሂንቴ ዋዛና ሚንላፊቴ። 9 ሂንቴ አዋቲ ታና ፓጩደሶና፤

2:12 ማዘ 22:22 2:13 አሳ 8:17-18 2:16 አሳ 41:8-9

አይታሙ ላይሌ ታ ኦሱዋ ቤዒዶሶና።

10 ሃሳ ጊሾ፣ ታ ሄ ዩሌቴላ ሃንቁታዳ፣
«ኤንቲ ኡባ ዎዴ ባንታ ዎዛናን ባሎሶና፤
ታ ኦጊያ ኤሪቦኮና» ያጋሰ።

11 ሃሳ ጊሾ፣ ታኒ ታ ሃንቁዋን ጫቃዳ፣
«ታ ሸምፖ ቤሳ ኡባካ ጌሎኮና» ያጋሰ።
ያጌሰ።

12 ታ አሻቶ፣ ሂንቴፊ ኦዴንካ፣ ዴዎ ያሳፊ ሂንቴና ሻኪያ ኢታኔ አማኖና ዎዛኒ ዶና ማላ ናጌቲቴ። 13 ሂንቴፊ ኦናካ ናጋሪ ባሌሌን፣ ባ ዎዛና ሚንሶና ማላ «ሃቺ» ያጌቲዲ ዪጌቲሺን ጋላሰ ጋላሰ ኢሶይ ኢሱዋራ ዘሬቲቴ። 14 ኑ ኮይሮ አማኑዋ ኑኒ ዉርሴሌ ጋካናው ሚንሱዲ ናጊኮ፣ ከሪሰቶሳራ ኢሲፊ ላታና። 15 ጌሻ ማፃፋን፣

«ሃቺ ያሳይ ጌይሳ ሂንቴ ሲዒያ ዎዴ
ሄ ዎዴ ኤንቲ ማካላቴላን ሃኒዳይሳዳ፣
ሂንቴ ዎዛና ሚንሶፊቴ»
ያጌሰ።

16 ያሳይ ጊያባ ሲዒዲ ማካሊዳይ ኦኔ? ሙሴይ ጊብዳፊ ካሌሌ ኬሲዳ ኡባ ጊዶኮናዬ? 17 ያሳይ ኦይታሙ ላይሌ ኦና ሃንቁቲዴ? ናጋራ ኦሌዳይሳታኔ ኤንታ አሃይ ባዞ ቢታን ዎጴ አቲዳ አሳታ ጊዶኮናዬ? 18 ቃሲ ያሳይ፣ «ታ ሸምፖ ቤሳ ጌሌኬታ» ያጊዲ ጫቁዳይ፣ ኢያው ከቴቶና ኢዳዳ አሳፔ አቲን ኦዴሴ? 19 ሂዛ፣ ኤንቲ ሄ ሸምፖ ቤሳ ጌሎና አቲዳይ አማኒቦና ጊሾ ጊዴይሳ ኑ ቤዎሰ።

4

1 ሂዛ፣ ያሳይ ኦና ባ ሸምፖ ቤሳ ጌልሳና ጊዳ ቃላይ ቡሮ ሲንሳፊ ዴዒያ ጊሾ ሂንቴፊ ኦኒካ ሄ ሸምፖ ቤሳ ጌሎና አቶና ማላ ናጌቶሰ። 2 ኤንታው ዎንጌላይ ሳባኬቲዳይሳዳ፣ ኑሰካ ሳባኬቲሰ። ሺን ኤንቲ ሲዒዳባ አማኒዲ ኤኪቦና ጊሾ ኤንታ ሳሳቤና። 3 ጊዶሺን፣ አላማይ ማጴቶሳፔ ዶሚዲ ያሳ ኦሶይ ፖሌቲዳይሳ ጊዲኮካ፣ ያሳይ፣

«ታኒ ታ ሃንቁዋን ጫቃዳ፣
ታ ሸምፖ ቤሳ ኡባካ ጌሎኮና»

ገዳይሳዳ፣ ኑኒ አማኒዳይሳቲ ኢያ ሼምፖ ቤሳ ጌላና። 4 ላፑንላ ጋላሳባ ኢሲ ቤሳን፣ «የሳይ ላፑንላ ጋላሳን ባ ኦሶ ኡባሬ ሼምፕሶ» ያገሰ። 5 ቃሲካ ሄ ቤሳን፣ «ኤንቲ ታ ሼምፖ ቤሳ ኡባራካ ጌሎኮና» ያገሰ። 6 ኮይሮ ዋንጌላ ሲዲዳይሳቲ ከቴቶና ኢዲዲ ሼምፖ ቤሳ ጌሊቦኮና። ያኒያ ጊሾ፣ ሃዲካ ሄ ሼምፖ ቤሳ ጌላና ኢሲ ኢሲ አሳቲ ዳዖሶና። 7 ሄሳ ጊሾ፣ የሳይ፣ «ሃቺ» ገዲ ያገሰ ኢሲ ጋላሰ ኑስ ቃንዲሰ። ዳሮ ዋዳፔ ጉዬ የሳይ ዳዊቲ ባጋራ፣

«የሳይ ገያባ ሃቺ ሂንቲ ሲዲያ ዋዳ

ሂንቲ ዋዛና ሚንሳፊቲ»

ያገዲ ኦዲሰ። 8 ኢያሱይ ኤንታው ሼምፕዋ አሚዳባ ገዲያኮ፣ የሳይ ሃራ ጋላሳባ ጉዬፔ ኦዳናሺን። 9 ሂዛ፣ የሳ አሳሰ ሳምባታ ሼምፖይ ናጌቲዲ ዳዔሰ። 10 የሳ ሼምፖ ቤሳ ጌሊያ ኦኒካ፣ የሳይ ባ ኦሱዋፔ ሼምፕዳይሳዳ ኢካ ባ ኦሱዋፔ ሼምፓና። 11 ሄሳ ጊሾ፣ ኦኒካ ሄ አሳ ከቴቲላ ኢፀዋ ካሊዲ፣ ኩንድናዳ የሳ ሼምፖ ቤሳ ጌላናው ሚኖሰ።

12 የሳ ቃላይ ዳዖኔ ኦሌይሳ። ናምቡ ባጋራ ቃራቲዳ ማሻፊ አዲዲ ኦጮ። ኢ ሼምፖ፣ አያና፣ ፃጶኔ ኮሊዜ ጋካናው ካንሉዲ ጫዳሰ። ቃሲ አሳ ዋዛናን ዳዲያ ጌሚዳ ቆፋኔ አሙዋ ሻኪዲ ፐርዳሰ። 13 የሳ ሲንሳፊ ቆሴቲያባይ አይባ ሜጴቴሉካ ባዋ። ኢያ አይፊ ሲንሳን ኡባባይ ቆንጮኔ ካሎ ዳዔሰ። ኑኒ ዛር አማናው ቤሴይ ኢያ ሲንሳና።

ገታ ካሂኔ ሃላቃ ዬሱሳ

14 ሂዛ፣ ሳሎ ኬዬዳ ገታ ካሂኔ ሃላቃይ፣ የሳ ናዓይ ዬሱሰ፣ ኑስ ዳዲያ ጊሾ ኑ አማኑዋ ሚንሉዲ ናጎሰ። 15 ኑ ካሂኔ ሃላቃይ ኑ ዳቡሪያ ዋዳ ኑስ ቃጴታናው ዳንዳዔይሳ። ኢ ናጋራ ኦሌቤና፣ ሺን ኑዳ ኡባባን ፓጩቲሰ። 16 ሂዛ፣ ማርቲላ ኤካናዉኔ ማዳ ኮሺያ ዋዳ አጶ ኬሃቴላ ዳማናው አጶ ኬሃቴላይ ዳዲያሱዋ የሳ አራታኮ ያዮና ሺቆሰ።

5

1 ኢሲ ኢሲ ካሂኔ ሃላቁ አሳ ገደፊ ደሬቲዲ፣ የሳራ ጋሊያባን አሳ ጊሾ ኢሞታኔ ናጋራ ያርሾ ያርሻናው ሹሜቲሰ። 2 ኢ ባ ሁዔን

4:3 ማዝ 95:11 4:4 ሜጴ 2:2 4:5 ማዝ 95:11 4:7 ማዝ 95:7-8 4:8 ዛሬ 31:7፤ ኢያ 22:4 4:10 ሜጴ 2:2

ደቡራንኛ ጊዲያ ጊሾ ኤሮናይሳታሲኔ ባሌይሳታስ ቃዴታናው ዳንዳዔስ።³ ኢ ባ ናጋራ ጊሾኔ አሳ ኡባ ናጋራ ጊሾ ያርሾ ያርሻናው ቤሴይ ሄሳሳ።

⁴ አኒካ ሃ ቦንቹዋ ባው ኤካናው ዳንዳዔና፣ ሺን አሮኒ ካሂኔ ሃላቃ ጊዳናው ያጌቲዳይሳዳ ያሳን ያጌታናው ቤሴስ።⁵ ሄሳዳካ፣ ኪሪስቶሲ ካሂኔ ሃላቃ ጊዲያ ቦንቹዋ ባው ኤኪቤና። ሺን ያሳይ ኢያ፣

«ኔኒ ታ ናዓ።

ሃቺ ታ ኔው አዋ ጊዳስ»

ያጌስ።⁶ ቃሲ ሃራሶን፣

«ማልኬፀዲቄይ ካሂኔ ጊዲዳይሳዳ፣

ኔኒ ሜሪናው ካሂኔ ጊዳና»

ያጌስ።

⁷ ዩሱሲ አሴ ጊዲዲ ሃ አላሚያን ዴዒያ ዋዴ ባና ሃይቆፔ አሻናው ዳንዳዒያ ያሳ ዳሮ ዩሆኒኔ አፋላን ዋሲሰ። ኢ፣ ኢያ ቦንቹዲ ኪቲቲዳ ጊሾ ያሳይ ኢያ ዋሳ ሲዒሰ።⁸ ዩሱሲ ያሳ ናዓ ጊዲሶካ ባ ዋዩቲዳ ዋያን ኪቲቲላ ታማሪስ።⁹ ሄሳንካ፣ ዩሱሲ ባ ኦሱዋ ፖሊዳፔ ጉዬ ባው ኪቲቲያ ኡባይ ሜሪና አቶቲላ ዴማና ሜላ ጋሶ ጊዲሰ።¹⁰ ያሳይ ማልኬፀዲቄ ሹሚዳይሳዳ ካሂኔ ሃላቃ ኦሊዲ ኢያ ሹሚሰ።

አማኑዋን ዳቡሮና ሜላ አሜቲዳ ናጊሶ

¹¹ ሃ ኑ ኦዳ ቦላ ጉጂ ሃሳያናባይ ዳሮባይ ዴዒሰ፣ ሺን ሂንቲ አከካይ ጉላ ጊዲያ ጊሾ ሂንቲው ኦዲ ጌልሳናው ዋይሴስ።

¹² ሂንቲ ሃናዴ አስታማሪ ጊዳናው ቤሴስ፣ ሺን ያሳ ቃላ ኮይሮ ቲሚርቲያ ሂንቲና ዛሪ ታማርሲያ ሃራ አሲ ኮሼስ። ሂንቲ ሚና ካላ ማናው ዳንዳዖና ጊሾ ማላ ኮሼስ።¹³ ማላ ፓሂቲያ ኦኒካ ዮጋ ናዓ ጊዲያ ጊሾ ሎዖኔ ኢታ ሻኪ ኤሪና።¹⁴ ሺን ሚና ካላ ሎዖኔ ኢታ ሻኪዲ ኤሪያ ካሃማ አሳሳ።

6

¹ ሂዛ፣ ኪሪስቶሳባ ታማርሲያ ኮይሮ ቲሚርቲያ አጊዲ ኪሪስቶሳን ካሃማቴላኮ ቦስ። ሃይቆ ኦሶፔ ሲሞባኔ ያሳ አማናባ

5:3 ሊዌ 9:7 5:4 ኪሳ 28:1 5:5 ማዝ 2:7 5:6 ማዝ 110:4
5:7 ማቶ 26:36-46፤ ማር 14:32-42፤ ሉቃ 22:39-46 5:12 1ቆሮ 3:2

ኮይር ተሚርቲያኮ ጉዬ ሲሞኩ። 2 ሄሳዳካ፣ ዲንቃቲታባ፣ * ኩሼ ምሰባ፣ ሃይቆፔ ዲንዶባኔ ማሪና ፒርዳባ ዛሪ ታማሮኩ። 3 ያሳይ ጊኮ ኑ ሄሳ ኦላና።

4 ኢሲ ቶሆ ፖጋይ ፖዒዳይሳታ፣ ሳሎ ኢሞታ ኤኪዳይሳታ፣ ጌሻ ኢያናን ሻኬቲዳይሳታ፣ 5 ሎጋ ያሳ ቃላኔ ሲንላፌ ያና ኣላሚያ ሞልቃ ቤዒዳይሳታ፣ 6 ጉዬፔ ካዲዳይሳታ ናጋራፔ ናሞዓንሎ ዛራናው ዳንዳዔቴና። ኣይስ ጊኮ፣ ኤንቲ ባንታ ቆዩሞስ ያሳ ናባ ዛሪ ካቂያ ማላ ማስቃሊያ ቦላ ኢያ ካቆሶናኔ ኣሳ ሲንላን ካወሾሶና።

7 ኡባ ሞዴ ኢ ቦላ ቡኪያ ኢራ ኡያዳ፣ ጎዩዳ ኡራ ማዲያ ካሊ ኣሚያ ቡቲያ ያሳን ኣንጅቲዳሮ። 8 ሺን ኣጉንሉኔ ከንቾቲ ዶሊያ ቡቲያ ኣይቢባካ ማዲኩ፤ ኢው ቃንጌላይ ማታቲስ፤ ወርሴላን ፀጌታና።

9 ኑ ሲቆ ኣሻቶ፣ ኑኒ ሃይሳዳ ኦዲያባ ጊዲኮካ፣ ሂንቴና ኣቶቴላኮ ካሌሊያ ሎጋባይ ሂንቴው ዳዔይሳ ኤርስ። 10 ያሳይ ሱሬ ፒርዳይሳ፣ ያሳይ፣ ሂንቴ ኦሊዳ ኦሱሞኔ ካሴ ጊዲን ሃዒካ ኣማኔይሳታ ማዲዲ፣ ኢያው ዳዒያ ሲቁም ቤሲዳይሳ ዶጌና። 11 ሂንቴ ኡባይ ኡፋይሳን ናጌይሳ ዳማና ጋካናው ሃ ሚኖቴላ ወርሴሊ ጋካናው ቤሳና ማላ ኑ ኣሞቶስ። 12 ሂንቴ ኣማኖኒኔ ዳንዳዓን ናጊያ ኡፋይሳ ላቲያ ኣሳ ዳናና ማላፔ ኣቲን ኣዛላ ጊዳና ማላ ኮዮኩ።

ያሳይ ኢሚዳ ኡፋይሳይ ሲዲሴና

13 ያሳይ ኣብራሃሚስ ኢማና ጊዲ ጫቂዳ ሞዴ ባፔ ኣዲያ ሃሪ ጊቲ ባይና ጊሾ ባ ሁዔን ጫቂስ። 14 ኢያኩ፣ «ታኒ ኔና ኣንጅና፤ ኔ ዜሬላካ ዳርሳና» ያጊስ። 15 ኣብራሃሚይ ዳንዳዓን ናጊዲ ያሳይ ኢማና ጊዳ ኡፋይሳ ኤኪስ።

16 ኣሲ ጫቂሼ ባፔ ጊታቲያ ኡራን ጫቂስ፤ ሄ ጫቆይ ጌቲቲዳባ ሚንሊዲ፣ ፓላማ ኡባ ቴቁስ። 17 ሄሳ ጊሾ፣ ያሳይ ባ ላሚቶና ቆፋ ኡፋይሳ ቃላ ላቴይሳታስ ቆንጨሳናው ኮዩዳ ጊሾ ጫቆን ሚንሊስ። 18 ያሳይ ሞርዶቴና፣ ኢያ ኡፋይሳ ቃላይኔ ጫቆይ፣ ናሞዓይካ ላሚቶኩና፣ ሃ ናሞዑባታን ኑ ሲንላን ዳዒያ ኡፋይሳ ኦይካናው ዳናዳዓና ማላ ጌሼ ዳማናው ኢያኮ ባቃቲዳ ኑኒ፣ ሞልቃማ ሚንሎሎ ዳማና።

19 ሃ ኡፋይሳይ ኑ ሽሞፑሞስ፣ ማርካቤይ ቃያናዳ ሚንሊዲ ኦይኪያ ቢራታ ማላ። ሄ ኡፋይሳይ ማጋራጅሞሬ ጉዬ ባጋን

* 6:2 ዲንቃቲታባ ሃ ቤሳን ዲንቃቲታባ ጌቲቲዳይ ዳማ ዳማ ጊሾ ሞጋታባ ኦዳናሳ። 6:8 ሜዴ 3:17-18 6:14 ሜዴ 22:16-17

ዳዲያ ገሻ ቤሳ ገሊሰ። 20 ዩሱሲ ማልኬፍ ቩማቴላዳ ማሪናው ካሂኔ ሃላቃ ገዲዲ፣ ኑ ገሽ ኑፔ ሲንሳቲዲ ሄ ቤሳ ገሊሰ።

7

ካሂኒያ ማልኬፍ

1 ማልኬፍቄይ፣ ሳሌሜ ካዎይ፣ ኡባፌ ቦላ ያሳ ካሂኔ። ሄ ማልኬፍቄይ ኣብራሃሜይ ካዎታ ኦሊ ያኒዲ ሲሚሺን ኢያራ ጋሄቲዲ ኢያ ኣንጂሰ። 2 ኣብራሃሜይ ባ ዲዲዳባ ኡባፌ ኢያው ኣሰራታ ኬሲዲ ኢሚሰ። ማልኬፍ ሱንሳይ ኮይሮ «ጂሎቴላ ካዎ»፣ ናዎዓንሉ፣ «ሳሌሜ ካዎ» ቢርሽላይ፣ «ሳሮቴላ ካዎ» ጉሱ። 3 ማልኬፍቄሰ ኣያ ዎይኮ ኣዉ ዎይኮ ዛሬ ፓይደይ ባዎ። ኢያ ዩሌቴላሰ ደሜላ ዎይኮ ኢያ ዳዑዎሰ ዉርሴላ ባዎ፣ ሺን ያሳ ናዓ ዳኒዲ ማሪናው ካሂኔ ገዲሰ።

4 ማልኬፍቄይ ኣይ ማላ ገቲኮ ቤዒቲ። ኑ ኣዎታ ማይዛይ፣ ኣብራሃሜይ፣ ባ ዳዲዳባ፣ ኢያው ኣሰራታ ኢሚሰ። 5 ካሂኔ ገዲያ ሌዌ ዛሬይ ኢሰራዔሌ ኣሳፔ፣ ሄሰካ ኣብራሃሜ ዜሬላ ገዲዳ ባንታ ኣሻታፔ ኣሰራታ ኤካና ማላ ሂይይ ከቲሰ። 6 ማልኬፍቄይ ሌዌ ዛሬ ገደና ኢዲኮካ ኣብራሃሜፔ ኣሰራታ ኤከሰ፤ ኡፋይሳ ቃሊ ዳዲያ ኣብራሃሜ ኣንጂሰ። 7 ጉላይ ገታን ኣንጃቴይሲ ፓላንፊና።

8 ኢሲ ባጋራ፣ ኣሰራታ ኤኬይሳቲ ሃይቄያ ኣሳታ፣ ሺን ሃራ ባጋራ ኣሰራታ ኤኬይሲ ዳዎን ዳዔሰ ያገዲ ኦይቲዳይሳ። 9 ሂዛ፣ ኣሰራታ ኤኬያ ሌዌይ፣ ኣብራሃሜ ባጋራ ኣሰራታ ኢሚሰ ጋናው ዳንዳዔቴሰ። 10 ኣይሰ ገኮ፣ ማልኬፍቄይ ኣብራሃሜ ጋሄቲያ ዎይ ሌዌይ ዩሌቲቦናባ ገዲኮካ፣ ባ ማይዛ ኣብራሃሜ ጉልባታን ዳዔሰ።

11 ኢሰራዔሌ ኣሳሰ ሂይይ ሌዌ ካሂኔቴላ ባጋራ ኢሚቲሰ። ሃ ሌዌ ካሂኔቴላይ ፖሎ ገዲዳባ ገዲያኮ ኣርናይሳ ማላ ገደናሺን፣ ማልኬፍቄይ ማላ ሃራ ካሂኔ ሹማናው ኣይሰ ኮሺዳ? 12 ሂዛ፣ ካሂኔቲ ላሜቲያ ዎይ ሂይይካ ቃሲ ላሜታናው ቤሴሰ። 13 ሃ ኑ ኢያባ ኦዲያ ኡራይ ሃራ ዛሬ፤ ኢያ ሹሻፔ ኦኒካ ያርሾ ቤሳን ካሂኔቴላን ኦሊቤና። 14 ኑ ጎዳይ ዩሁዳ ሹሻፔ ዩዳይሲ ኤራቲዳይሳ። ገደሺን፣ ሙሴይ ካሂንቴባ ኦዲሹ ዩሁዳ ዛሪያባ ኣይባካ ኦዲቤና።

6:19 ሌዌ 16:2 6:20 ማዝ 110:4 7:1 ሜዴ 14:17-20 7:5 ታይ 18:21

15 ማልኬፀዳቄ ሜላ ሃራ ካሂኔይ ዩዳባ ገዲያኮ ሃ ኑ ኦዲያባይ አዲ ቆንጫና። 16 ኢ ካሂኔ ገዲዳይ ጳዮና ዴዑዋ ዋልቃናፔ ኣቲን ኢያ ማይዛ ሂጌኒኔ ዋጋን ገዴና። 17 ገሻ ማፃፋይ፡

«ማልኬፀዳቄ ካሂኔቲላ ሜላ፡ ኔኒ ሜሪናው ካሂኔ»

ያገዲ ማርካቴስ። 18 ኮይሮ ሂጌይ ዳቡራንቾኔ ማዶናባ ገዲያ ገሾ ሻሬቲስ። 19 ሙሴ ሂጌይ ኣይቢንካ ፖሎ ኦላናው ዳንዳቢና። ሺን ኑኒ ኢያ ባጋራ ያሳኮ ሺቂያ ኡባፌ ኣዲያ ኡፋይሳ ቃላይ ኑስ ኢሚቲስ።

20 ኪሪስቶሲ ካሂኔ ገዲያ ዋዴ ያሳይ ጫቂስ፡ ሺን ሃራቲ ካሂኔ ገዲዳ ዋዴ ሄሳ ሜላ ጫቆይ ባዋ። 21 ሺን ዬሱሲ ጫቆን ካሂኔ ገዲስ። ያሳይ ያገዲ ጫቂስ፤

«ጎዳይ ጫቂስ፤ ኢ ባ ቆፋ ላሚና፤ ሳኒ ሜሪና ካሂኔ» »

ያገስ። 22 ሃ ጫቁዋ ጋሶን ዬሱሲ ኑስ ኡባፌ ኣዲያ ቃላ ጫቁዋስ ዋሴ ገዲስ።

23 ካሂኔቲላን ኦላና ሜላ ሃይቆይ ኤንታ ዲጊዳ ገሾ ኮይሮ ካሂኔታ ታይቦይ ዳሮ። 24 ሺን ዬሱሲ ሜሪናው ዴዲያ ገሾ ኢያ ካሂኔቲላ ሃሪ ላቲና። 25 ሄሳ ገሾ፡ ኢ ኡባ ዋዴ ኤንታ ገሾ ጋናታናው ሜሪናው ዴዲያ ገሾ ያሳኮ ኢያ ባጋራ ዬይሳታ ፖሎ ኣሻናው ዳንዳቤስ።

26 ሂዛ፡ ኑስ ኮሺያባ ኢሚያ፡ ገሻይ፡ ቦሬይኔ ቱኒ ባይናይሲ፡ ናጋራንቾታፔ ሻኬቲዳይሲኔ ሳሉዋፔ ኣዲዲ ጶቂዳ ካሂኔ ሃላቃይ ኑስ ኮሺስ። 27 ኢ ሃንኮ ካሂኔ ሃላቃታ ሜላ ኮይሮ ባ ናጋራ ገሾ ካሊዲ ኣሳ ናጋራ ገሾ ጋላስ ጋላስ ያርሾ ያርሻናው ኮሺና። ኢ ባና ያርሺዳ ዋዴ ዛሬላና ኦጌን ኢሲ ቶሆ ባና ያርሺስ። 28 ሙሴ ሂጌይ ዳቡራንቾ ኣሳ ካሂኔ ሃላቃ ኦሊዲ ሹሚስ። ሺን ሂገያፌ ጉዬ ዩዳ ጫቆ ቃላይ ሜሪናው ፖሎ ገዲዳ ያሳ ናባ ሹሚስ።

8

ዬሱሲ ኑ ካሂኔ ሃላቃ

1 ኑኒ ሃሳያ ገታባይ ሄሳ። ሳሉዋን ኡባፌ ቦላ ያሳ ኣራታፔ ኡሻቻ ባጋን ኡተዳ ሃይሳ ማላ ካሂኔ ሃላቃይ ኑሰ ዴዔስ። 2 ኢ ኣሳን ገደናሺን ጎዳን ኡቁዳ ቱማ ዲንካኒያን ያሳ ኬላን ኦሌስ።

3 ካሂኔ ሃላቃ ኡባይ ኢሞኔ ያርሾ ያርሻናው ሹማቴስ። ሄሳ ገሹ፣ ሃ ካሂኔይ ያርሻናው ኢሰባይ ዳናው ኮሼስ። 4 ሂጌይ ከቴይሳዳ ያርሺያ ካሂኔቲ ዴዒያ ገሾ ከሪሰቶሲ ሳዓን ዴዒያባ ገዲያኮ ካሂኔ ገዴና። 5 ኤንቲ ካሂኔቴላን ኦሊያ ዲንካኔይ ሳሎን ዴዒይሳሰ ለሚሶኔ ኩያ። ሙሴይ ዲንካኒያ ኤሲያ ዋዴ ያሳይ ኢያኮ፣ «ታኒ ኔና ዴሪያ ቦላ ቤሲዳ ለሚሱዋ ካላዳ ኦላ» ያገሰ። 6 ሺን ዩሱሲ ገደ ገዲዲ ሲጌሊያ ጫቆይ፣ ኮይሮ ጫቁዋፔ ኣጂይሳዳ ኢ ኤኪዳ ኦሶይ ኤንታይሳፌ ኣጂስ። ሄሲ ኤቁዳይ ኣጂያ ጫቆ ቃላና።

7 ኮይሮ ጫቁዋን ባሊ ባይናባ ገዲያኮ ናምዓንሉ ጫቆ ኮሼና። 8 ሺን ጎዳይ ኢያ ቦሪዲ፣ ሃይሳዳ ያገሰ።
«ታኒ ኢሰራዔሌ ኣሳራኔ ዪሁዳ ኣሳራ ኦራላ ጫቆ ጫቁያ ዋዴይ ያና።

9 ሄ ጫቆይ ታ ኤንታ ኣዋታ ገብፄ ቢታፌ ኩሺያ ኦይካዳ፣ ጎቻ ኬሲዳ ዋዴ ኤንታራ ጫቁዳ ጫቁዋ ማላ ገዴና።
ኤንቲ ታ ጫቁዋን ኣማኔቲቦና ገሾ
ታኒ ኤንታ ዩጋ ኣጋሰ ያጌስ ጎዳይ።

10 ሺን ሂዛፔ ጉዩ ኢሰራዔሌ ኣሳራ ታ ጫቃና ጫቆይ ሃይሳ ያጌስ ጎዳይ።
ታኒ ታ ሂጊያ ኤንታ ጉጊያን ዋላና፤
ኤንታ ዋዛናን ፃፋና።

ታኒ ኤንታ ያሳ ገዴና፤
ኤንቲካ ታ ኣሴ ገዴና።
11 ኤንታፌ ኦኒካ ባ ሾሩዋ ዋይኮ ባ ኢሻ፣
ጎዳ ኤራ፣ ያገዲ ታማርሴና።
ኤንቲ ጉላፌ ገታ ጋካናው
ኡባይ ታና ኤራና።

12 ታኒ ኤንታ ናቁዋ ኣቶ ጋና፤
ኤንታ ናጋራ ዛራ ቆፒኬ» ያጌስ።

13 ያሳይ ሃ ጫቁዋ «ኦራሊ» ገዲ ዪገሺ ኮይሮይሳ ጋልዒሲስ። ሂዛ፣ ጋልዒይኔ ጩጋይ ጳያ ዋዴይ ጋኪስ።

9

ሳሎ ጎይኖን ሳዓ ጎይኖ

1 ኮይሮ ጫቁዋሰ ያሳ ጎይኒያ ዋጋይን ሳዓ ያሳ ከላይ ዳዔስ።

2 ዲንካኔይ ኤቁስ። ኢያን ያምፔ ዋሊያ ኮጫይ፣ ዓርጵዛይን ጎዳ ሲንላን ዋሊያ ኡይላይ ዳዔስ፤ ሄ ቤሳይ ጌሻ ቤሳ ጌቴቴስ።

3 ናምዓንሉ ማጋራጃዋፊ ጉዬ ባጋራ ዳዔያ ቤሳይ ኡባፊ ጌሻ ቤሳ ጌቴቴስ።

4 ኢያ ጊደን ኢፃኔ ጨዩሲያ ዋርቃ ሳፃኔይን ዋርቃን ሜሼተዳ ጫቆ ታቦቴይ ዳዔስ። ሄ ጫቆ ታቦቴያን ማናይ ዳዔያ ዋርቃ ዓሮይ፣ ኣጪዳ ኣሮና ዓምዓይን ሙሴ ሂጌይ ዓፊተዳ ናምዑ ሎቹ ሹቻተ ዳዖሶና።

5 ሄ ታቦቴያፔ ቦላ ባጋራ ኣቶቴላ ካማ ባንታ ቁፊያን ጌንሊያ ቦንቾ ከሩቤቴ ዳዖሶና። ሺን ሃዒ ሄ ኡባ ቆንጪሲዲ ኦዳናው ዳንዳዖኮ።

6 ሃ ኡባይ ሃይሳዳ ጊጊዳፔ ጉዬ፣ ካሂኔቴ ኡባ ዋዴ ባንታ ኦሱዋ ኦላናው ዲንካኒያሰ ኮይሮ ከፊሊያ ጌሎሶና።

7 ሺን ካሂኔ ሃላቃ ዓላሊ ዲንካኒያሰ ናምዓንሉ ከፊሊያ ላይላፊ ኢሲ ቶሆ ጌሌስ። ኢ ያ ጌሊሼ ባ ናጋራ ጊሾኔ ኣሳይ ኤሮና ኦሊዳ ናጋራ ጊሾ ሱላ ያርሾ ኤኮና ጌሌና።

8 ኮይሮ ዲንካኔይ ኤቁዲ ዳዒሺን፣ ኡባፊ ጌሻ ቤሳ ኤፊያ ኦጌይ ቡሮ ዶዬቴቦናይሳ ጌሻ ኣያናይ ሄሳን ኤሪሴስ።

9 ሄሲ ሃ ዋዲያሰ ለሚሶ፤ ያሳሰ ኢሚቴያ ኢሞይኔ ያርሾይ ጎይኒያ ኡራ ካሃ ጌሻናው ዳንዳዖናይሳ ሃይሲ ቤሴስ።

10 ሄሳቴ ሙሳባ፣ ኡሻባኔ ዲማ ዲማ ሜቻ ዋጋታ ኦዴይሳታ። ኤንቴ ኦራላ ዋጋይ ያና ጋካናው ኦሴቴያ ካሬ ባጋ ዋጋታ።

11 ሺን ከሪሰቶሲ ሃዒ ኦ ዳሚዳ ሎዖባታሰ ካሂኔ ሃላቃ ጊዲዲ ዩስ። ኢ ጌሊዳ ዲንካኔይ ጊታኔ ፖሎ ጊዲዳይሳ።

12 ሄ ዲንካኔይ ኣሳ ኩሼን ኦሴቴቤና ቃሲ ሃ ኣላሚያባ ጊዴና።

13 ከሪሰቶሲ ኡባፊ ጌሻ ቤሳ ጌሊያ ዋዴ ዳሻ ሱሊኔ ማራ ሱሊ ኤኪዲ ጌሊቤና። ሺን ሜሪና ኣቶቴላ ኢማናው ባ ሱላ ኤኪዲ ዛሬሉና ኦጌን ኢሲ ቶሆ ጌሊስ።

14 ዳሻ ሱላይኔ ኮርማ ሱላይ፣ ፀጌቴዳ ኡሳ ቢዶይ፣ ቱኒዳ ኣሳ ቦላ ቆርጩቴዲ ኤንታና ጌሺያባ ጊዲኮ፣

9:2 ኬሳ 26:1-30፣ 25:31-40 9:3 ኬሳ 26:31-33 9:4 ኬሳ 30:1-6፣ 25:10-16፣ 16:33፣ ታይ 17:8-10፣ ኬሳ 25:16፣ ዛሬ 10:3-5 9:5 ኬሳ 25:18-22 9:6 ታይ 18:2-6 9:7 ለዌ 16:2-34 9:13 ለዌ 16:15-16፣ ታይ 19:9፣ 17-19

ጾሳ ሳና ኢሚዳ ከሪሰቶሳ ሱላይ፣ ዴፆ ጾሳ ጎይናና ሜላ ሃይቆ ካሌሊያ ኦሱዋፔ ኑ ካሃ ዋቲ ኣሊ ጌሼኔ?

15 ሃሳ ጊሾ፣ ጭቲዳይሳቲ ጾሳይ ኢሚዳ ሜሪና ላታ ኤካና ሜላ ከሪሰቶሳ ኦራላ ጫቁዋሰ ጊዶ ጊዲዲ ሲጌሌይሳ ጊዲሰ። ሄሲ ሃኒዳይ ኣሳይ ኮይሮ ጫቁዋፔ ጋርሳን ዴዲያ ዎዴ ኦሊዳ ናጋራፔ ኤንታና ዎዛናው ኢ ሃይቁዳይሳና።

16 ሃዛ፣ ኬኬይ ዴዲኮ፣ ሄ ኬኪዳ ኡራ ሃይቆይ ኤሬታናው ኮሼሰ። 17 ኬኪዳ ኡራይ ሃይቁኮ ኢያ ኬኬይ ሚኔሰ። ኬኪዳ ኡራይ ሃይቆና ኣቲኮ ኢያ ኬኬይ ኦሌና።

18 ሃሪ ኣቶሺን፣ ኮይሮ ጫቆይካ ሱሊ ባይና ሚኒቤና።

19 ሙሴይ ሃጌ ከታ ኡባ ኣሳሰ ኦዲዳፔ ጉዬ ማራ ሱሊኔ ዴሻ ሱሊ ሃላራ ዋላኪዲ፣ ዘዎ ዶርሳ ኢኪሴኔ ሃሶጳ ቦንጮ ኤኪዲ፣ ማፃፋ ቦላኔ ኣሳ ቦላ ወርጂሰ። 20 ሙሴይ ኣሳኮ፣ «ሃንቲ ናጋና ሜላ ጾሳይ ከቲዳ ሱላ ጫቆይ ሃይሳ» ያጊሰ።

21 ሃሳዳካ፣ ዲንካኒያ ቦላኔ ኦሊያ ሚሼ ኡባ ቦላ ሱላ ወርጂሰ።

22 ቱማካ ሃጌይ ጌይሳዳ ጉላባታፔ ኣቲን ኡባባይ ሱላን ጌዬሰ። ሱሊ ጉኮናሺን ኣቶቴሊ ባዎ።

ዬሱሳ ፖሎ ያርሼቴላ

23 ሳሎዋባሰ ለሚሶ ጊዲዳይሳቲ ኡባይ ሜሄ ያርሾን ጌያናው ኮሼሰ። ሺን ሳሎባቲ ባንታ ሁዔን ሃሳፌ ኣጲያ ያርሹዋን ጌያናው ኮሼሰ።

24 ከሪሰቶሳ ቱማ ጾሳ ኬላሰ ለሚሶ ጊዲዳ፣ ኣሳ ኩሼን ኦሴቲዳ ኡባፌ ጌሻ ቤሳ ጌሊቤና። ሺን ኢ ሃዒ ኑ ጊሾ ጾሳ ሲንላን ቤንታናው ሳሎዋ ጌሊሰ። 25 ካሄኔ ሃላቃይ ላይላን ላይላን ባ ሱሊ ጊዶናይሳ ኤኪዲ፣ ኡባፌ ጌሻ ቤሳ ጌሊሰ። ሺን ከሪሰቶሳ ዳሮ ቶሆ ባና ያርሻናው ሳሎ ጌሊቤና። 26 ሃሳዳ ሃኒዳባ ጊዲያኮ፣ ከሪሰቶሳ ኣላሜይ ሜጴቶሳፔ ዶሚዲ ዳሮ ቶሆ ዎዴታናው ኮሼሰ። ሺን ሃዒ ዎዲያ ወርሴላን ናጋራ ዲጋናው ባና ያርሺዲ ዛሬላና ኦጌን ኢሲ ቶሆ ቤንቲሰ።

27 ኣሲ ኡባይ ኢሲ ቶሆ ሃይቃናው ሃሳፌ ጉዬ ፒርዳታናው ቤሴሰ። 28 ሃሳዳካ፣ ከሪሰቶሳ ዳሮ ኣሳ ናጋራ ዲጋናው ኢሲ ቶሆ ያርሹቲሰ። ሺን ኢ ናጋራ ቶካናው ጊዶናሺን ባና ናጌይሳታ ኣሻናው ናምዓንሖ ቆንጫና።

10

1 ሙሴ ሂጌይ ያናው ዳዲያ ሎዎባታስ ኩያፔ ኦቲን ባ ሁዔን ዋና ጊዳና። ሄሳ ጊሾ፣ ላይላን ላይላን ፓጩይ ባይና ያርሼቲያ ያርሾይ ጎይናናው ሸቂያ አሳ ፖሎ ኦላናው ዳንዳዔና። 2 ሂጌይ ኤንታ ፖሎ ኦላናው ዳንዳዔዳባ ጊዲያኮ ኤንቲ ያርሾ ያርሼይሳ አጋናሺን። ቃሲ ጎይናናው ሸቂያ አሳይ ባንታ ናጋራፔ ጌያና፤ ኤንታ ካሃይካ ኤንታና ባላ ጊዲ ሞቲና። 3 ሺን ሄ ያርሾቲ ላይላን ላይላን ናጋራ ቆፊሶሶና። 4 አይስ ጊኮ፣ ኮርማ ሱሊኔ ዳሻ ሱሊ ናጋራ ዲጋናው ዳንዳዔና።

5 ሄሳ ጊሾ፣ ኪሪስቶሲ ሃ አላሚያ ዪዳ ዎዴ ሃይሳዳ ያጊስ፡ «ኔኒ ያርሾኔ አሞ ኮያባካ፤ ሺን ታው አሾ ጊሊሳዳሳ።»

6 ኔኒ ፀጌቲያ ያርሾኔኔ ናጋራ ያርሹዋን ኡፋይታባካ።

7 ሄ ዎዴ ታ ጊሾ ማፃፃን ፃፊቲዳይሳዳ፣ ጎዳው፣ ታኒ ኔ ሺኒያ ኦላናው ያስ) ያጋስ»

ያጊስ። 8 ያርሾይ ያርሼታና ሜላ ሂጌይ ከቲያባ ጊዲኮካ፣ ኪሪስቶሲ ኮይሮ፣ «ኔኒ ያርሾኔ አሞ፣ ፀጌቲያ ያርሾኔ ናጋራ ያርሾ ኮያባካ፤ ኤንታን ኡፋይታባካ» ያጊስ። 9 ካሊዲካ ኢ፣ «ጎዳው፣ ሄኮ ታኒ ኔ ሺኒያ ኦላናው ያስ» ያጊስ። ሄሳ ጊሾ፣ ኪሪስቶሲ ናምዓንጹዋ ኡሳናው ኮይሮይሳ ሻሪስ። 10 ዩሱስ ኪሪስቶሲ ያሳ ሺኒያ ኦሊዲ፣ ዛሬላና ኦጌን ኢሲ ቶሆ ባ አሹዋ ያርሼዳ ጊሾ ኮኒ ጌዪዳ።

11 ካሂኔ ኡባይ፣ ናጋራ ዲጋናው ዳንዳዎና ሄ ያርሾታ ጋላስ ጋላስ ያርሼሼ ኤቂዲ ባ ኦሱዋ ኦሌስ። 12 ሺን ኪሪስቶሲ ኡባ ዎዴስ ጊዲያ ኢሲ ናጋራ ያርሹዋ ያርሼዲ፣ ያሳፌ ኡሻቻ ባጋን ኡቲስ። 13 ሄ ዎዲያፔ ዶሚዲ ኢያ ሞርኬቲ ኢያ ቶሆይ ዩዲያባ ኦላና ጋካናው ናጌስ። 14 ኢ ዛሬላና ኦጌን ኢሲ ቶሆ ባና ያርሼዳ ያርሹዋን ጌሻታ ሜሪናው ፖሎ ኦሊስ።

15 ቃሲ ጌሻ አያናይ ኦስ ሃይሳ ማርካቲስ። ኮይሮ ሃይሳዳ ያጊስ፡

16 «ሄ ጋላሳታፔ ጉዬ፣ ታኒ ኤንታራ ጫቂያ ጫቆይ ሃይሳ፣ ታኒ ታ ሂጊያ ኤንታ ቆፋን ዎላና፤ ኤንታ ዎዛናን ፃፋና»

ያጌሱ። 17 ካሊዲካ፥
«ታኒ ኤንታ ናጋራኔ
ኤንታ ኢታ ኦሱዋ ዛራ ቆፒኬ»

ያጌሱ። 18 ሂዛ፥ ናጋሪ አቶ ጌቴቲዳፔ ጉዬ ናጋራሰ ያርሼቲያ ያርሾ ኮሼና።

እኔ ያሳኮ ሺቆሰ

19 ሂዛ፥ ታ አሻቶ፥ ኮኒ ዬሱሳ ሱላ ባጋራ ኡባፌ ጌሻ ቤሳ ጌላናው ኩሰ ሚኖቴሌ ደዔሰ። 20 ኑ ጌላናይ ኪሪሰቶሲ ባ ማጋራጃዋ፥ ሄሲካ ባ አሹዋ ባጋራ ኩሰ ደዩዳ ኦራሴኔ ዴያ ጊዲዳ ኦጊያና። 21 ኩሰ ያሳ ኬላ ቦላ ሹሚቲዳ ጊታ ካሂኔ ሃላቃይ ደዔሰ። 22 ኮኒ ኢታ ካሃፔ ጌያናው ኑ ዋዛና ዉርፄቲዲ፥ ኑ አሳቴላ ፃሎ ሃላን ማጨቴዲ፥ ሱሬ ዋዛናኒኔ ፖሎ አማኖን ያሳኮ ሺቆሰ።

23 ኩሰ ኡፋይሳ ቃላ ኢሚዳ ያሳይ አማንቲዳይሳ ጊዲያ ጊሾ ኑ ማርካቲያ ኡፋይሳ ኡሻቸ ሃዲርሲ ጎና ሚንሌዲ ኦይኮሰ። 24 ኢሶይ ኢሱዋ ሲቆሲኔ ሎ? ኦሶሰ ዋቲ ዴንጫኔኮ እኔ ቆፖሰ። 25 ኢሶቲ ኢሶቲ ሜዜ ኦሊዲ ሸቄይሳ አጊዳይሳዳ ኮኒ ኢሲፌ ሸቄይሳ አጎኩ። ሺን ጎዳ ጋላሳይ ማታቲዳይሳ ሂንቴ ቤዒያ ጊሾ ሄሳ ካሴይሳፌ አሊዲ ኦሊቴ።

26 ኮኒ ቱማ ኤራቴላ ኤኪዳፔ ጉዬ ኤሪሼ ናጋራ ኦሊኮ፥ ሂዛፔ ኑ ናጋራ ጊሾ ያርሼታና ያርሾይ ባዋ። 27 ሺን ሂዛ አቲዳይ ያሺያ ፒርዳኔ ያሳ ሞርኬታ ፀጋናው ጊጊዳ ዋልቃማ ታማ። 28 ሙሴ ሂጊያ ኪቴቶና ኢፂዳ ኦኒካ ናምቡ ዋይኮ ሄቩ አሲ ኢያ ቦላ ማርካቲኮ ቃጴይ ባይናሺን ሃይቄሰ። 29 ያቲን፥ ያሳ ናዓ ካጲዳ ኡራይ፥ ባና ጌሺዳ ያሳ ጫቆ ሱላ ቱናባዳ ቆፒዳ ኡራይ፥ ቃሲ አጶ ኬሃቴላ አያና ጫዩዳ ኡራይ፥ አይ ማላ ኢታ ፒርዳ ኤካናው ቤሲያኮ እኔ ቆፒቴ።

30 ሂዛ፥ «ሃሎ ኬሶይ ታባ፥ ታ ኩሼ ዛራና» ጊዳይሳ ኑ ኤርሰ። ቃሲካ፥ «ጎዳይ ባ አሳ ፒርዳና» ያጊሰ። 31 ዴያ ያሳ ኩሼን ኩንዴሌ ዳር ያሼሰ።

32 ሂንቴው ያሳ ፖይይ ፖዒዳፔ ጉዬ ሂንቴ ዳር ዋዩን፥ ጊታ ባፄን ጌንጨዳ ቤኒ ዋዲያ ቆፒቴ። 33 ኢሲ ኢሲ ቶሆ ሂንቴ አሳ ሲንላን ጫዩቲዴታ፤ ጎዴቲዴታ፤ ኢሲ ኢሲ ቶሆ ሄሳ ማላ

10:16 ኤር 31:33 10:17 ኤር 31:34 10:22 ሉዌ 8:30፤ ሂዛ 36:25
10:27 ኢሳ 26:11 10:28 ዛሬ 17:6፤ 19:15 10:29 ኬሳ 24:8
10:30 ዛሬ 32:35፣ 36

ዋዩይ ጋኪዳ አሳራ ኢሲፌ ዋዩይታ። 34 ቃሾን ደዲያ አሳሰካ ቃዴቲዳታ። ሂንቴው ሎጾኔ ቆዮና ሻሎይ ሳሎን ደዴይሳ ሂንቴ ኤሪዳ ጊሾ ሂንቴ ሻሎይ ቦንቁቲያ ዋዩ ኡፋይሳን ዳንዳዲዳታ።

35 ሃሳ ጊሾ፣ ጊታ ዋይቶይ ደዲያ ሂንቴ ሚኖቴላ ዩጎፊቴ።

36 ያሳ ሼኒያ ፖሊዲ፣ ኢ ሂንቴው አማና ጊዳ ኡፋይሳ ኤካና ጋካናው ጌንጫናው ኮሼሰ። 37 ሂዛ፣ ጌሻ ማፃፋን፣

«ኢ፣ ያና ጊዳይሲ ያና፤ ጋሞዔና።

38 ሺን ታ ደሎይ፣ ታናን አማኔቲዲ ዳና፤

ኦኒካ ጉዬ ሲሚኮ ታና ኡፋይሴና»

ያጌሰ። 39 ኦኒ አማኔቲዲ አቲያ አሳ ባጋፌ አቲን ጉዬ ሲሚዲ ቆያ አሳ ባጋ ጊደኮ።

11

አማኖ

1 አማኖይ ጉሳይ፣ ደማና ጊዲ ኡፋይሳን አማኔቲዲ ናጊያባኔ ኑ ቤያናባ ቤዲያዳ ኦሊዲ ኤኪያባ። 2 ቤኒ አዋቲ አማኖን ያሳፌ ማርካቴላ ኤኪደሶና።

3 አላሚይ ያሳ ቃላን ሜዴቲዳይሳ ኑ አማኖን ኤሮሰ። ቃሲ ቤንቲያባይ ቤንቶናባፕ ሜዴቲሰ።

4 አቤሊ ቃዔላይሳፌ አዲያ ያርሾ ያሳሰ ያርሺዳይ አማኖና። ያሳይ አቤላ አሙዋ ኡፋይቲዲ ኤኪዳ ዋዩ ኢ ደሎ ጊዲዳይሳ ማርካቲሰ። አቤሊ ሃሪ አቶሺን፣ ሃይቁዲካ ባ አማኑዋን ሃዲ ጋካናው ኦዴሰ።

5 ሄኖኬይ ሃይቆና ሳሎ ቢዳይ አማኖና። ያሳይ ኢያ ኤኪዳ ጊሾ ኦኒካ ኢያ ቤዓናው ዳንዳዲቤና። ሄኖኬይ ሳሎ ኤኬታናፕ ሲንሐ ኢ ያሳ ኡፋይሴዳ አሲ ጊዴይሲ ኦዴቲሰ። 6 አማኖይ ባይና ኦኒካ ያሳ ኡፋይሳናው ዳንዳዴና። ያሳኮ ያ ኦኒካ ያሳይ ደዴይሳኔ ባና ኮዬይሳታሰ ዋይቶ አሚይሳ አማኖናው ኮሼሰ።

7 ኖሄይ ቡሮ ቤንቶናባሰ ያሳይ ኢያው ኦዲዳ ዋዩ ያሳሰ ያዩዲ፣ ባናኔ ባ ሶ አሳ አሻናው አማኖን ማርካቤ ኬዲሰ። ያቲዲ ባ አማኑዋን አላሚያ ፒርዲዲ፣ አማኖን ቤንቲያ ደሎቴላ ያሳፌ ኤኪሰ።

8 አብራሃሚይ ላታ ኦሊዲ ኤካና ቢታ ባና ሜላ ያሳይ ኢያ ያጊዳ ዋዩ ሃሪ አቶሺን፣ ኢ አው ቢያኮ ኤሮና ኢዲኮካ ኪቲቲዳይ

10:37 ኢብ 2:3-4 11:3 ሜዴ 1:1፤ ማዝ 33:6፣ 9፤ ዮሃ 1:3 11:4 ሜዴ 4:3-10 11:5 ሜዴ 5:21-24 11:7 ሜዴ 6:13-22

አማኖና። 9 ኢብራሃም ያሳይ ኢያው አማና ጊዳ ቢታን ቤቴ አሳዳ ደዲዳይ አማኖና። ያሳይ ሄ አማና ጊዳይሳ ኢያሪ ኢሲፌ ለታናው ደዲያ ዩሳቃሪኔ ያይቆባራ ዋላ ዲንካኔን ደዲሰ። 10 ኢ፣ ያሳይ ቆፒዲ ከፀዳ ፃላ ባሶይ ደዲያ ካታማ ናጌሰ።

11 ሳራ ባ ሁዔን ጨሚዳባ ጊዲኮካ ኡፋይሲ አሚዳ ያሳይ አማኔቲዳይሳ ጊዳይሳ ኤሪዳ ጊሾ ቃንላታናው ዋልቃ ደሚዳይ አማኖና። 12 ሄሳ ጊሾ፣ ሃይቂዳ ኣሲ ዳኒያ ኢሲ አዲያፌ ሳሎ ያለንቶ ማላኔ ኣባ ጋፃን ደዲያ ታይቦይ ባይና ሻፌ ማላ ዜሬላይ ዩሌቲዶሶና።

13 ሄ አሳ ኡባይ ባንታው ጌቴቲዳ ኡፋይሳ ቃላ ኤኮና አማኖን ሃይቂዶሶና። ሺን ሃሆራ ሄሳ ቤዲዲ፣ ደሚዳዳ ኦሊዲ፣ ኡፋይሳን ኤከዶሶና። ቃሲ ኤንቲ ሳዓን አማፍኔ ቤቴ ኣሲ ጊዳይሳ ኤሪዶሶና። 14 ሄሳዳ ጊያ አሳይ ባንታ ቢታ ናጌይሳ ቆንጨን ቤሴሰ። 15 ኤንቲ ሄ ኣጊዲ ከፀዳ ቢታ ጉዬ ቆፒዳባ ጊዲያኮ ጉዬ ሲማናው ዳንዳፆሶና። 16 ሺን ሃዲ አፂ ሎዲያ ሳሎ ቢታ ላሞቶሶና። ሄሳ ጊሾ፣ ያሳይ ኤንታው ካታማ ጊሲሲዳ ጊሾ «ኤንታ ያሳ» ጌቴቲዲ ጃጌታናው ዩላቴና።

17 ኢብራሃም ፓጩቲዳ ዋዴ ዩሳቃ ያርሺዳይ አማኖና። ሄ ኡፋይሳ ቃላ ኤከዳ ኢብራሃም ባ ኢሲ ናዓ ያርሻናው ጊሲሰ።

18 ያሳይ ኢብራሃምኮ፣ «ኔ ዜሬላይ ዩሳቃ ባጋሪ ጃጌታና» ያጊዲ ኦዲሰ። 19 ያሳይ ሃይቆፔ ዳንላናው ዳንዳዔይሳ ኢብራሃም ደሚዳ ጊሾ ዩሳቃ ሃይቆፔ ፓፂ ዳንዲዳዳ ኦሊዲ ዛሪ ኤከሰ።

20 ዩሳቂ ዋዴፔ ሃናናባ ኤሪዲ ያይቆባኔ ኤሳቂ ኣንጂዳይ አማኖና።

21 ያይቆቢ ሃይቃና ሃኒሹ፣ ኢሲ ኢሲ ዮሴፋ ናይታ ኣንጂዳይኔ ጉፌ ቦላ ካቲዲ ጎይኒዳይ አማኖና።

22 ዮሴፌ ሃይቃናው ማቲዳ ዋዴ ኢሰራዔል አሳይ ጊብፃፌ ከያናይሳ ኦዲዳይኔ ባ ማቄሳ ኦላናባ ኤንታ ከቲዳይ አማኖና።

23 ሙሴይ ዩሌቲዳፔ ጉዬ ኢያ ኣያኔ ኢያ ኣዋይ ማላ ሎፆ ናዓ ጊዲዳይሳ ቤዲዲ ሄሹ ኣጌና ቆቲዳይ አማኖና፤ ኤንቲ ካወዋ ኣዋጂዋ ያዩቦኮና።

11:8 ሜዴ 12:1-5 11:9 ሜዴ 35:27 11:11 ሜዴ 18:11-14፤ 21:2
11:12 ሜዴ 15:5፤ 22:17፤ 32:12 11:13 ሜዴ 23:4፤ 1ታሪ 29:15፤
ማዝ 39:12 11:17 ሜዴ 22:1-14 11:18 ሜዴ 21:12 11:20
ሜዴ 27:27-29፤ 39-40 11:21 ሜዴ 47:3፤ 48:1-20 11:22 ሜዴ
50:24-25፤ ኬሳ 13:19 11:23 ኬሳ 1:22፤ 2:2

24 ሙሴይ ዲጨዳፔ ጉዬ ገብፄ ካወዋ ናዔ ናዓ ጌቲታናይሳ ኢዲይይ ኣማኖና። 25 ሙሴይ ናጋራን ጉላ ዋዴሰ ኡፋይታናፔ፣ ያሳ ኣሳራ ዋዬ ኤካናይሳ ዶሪሰ። 26 ኢ ዋዴፔ ዴማና ዋይቱዋ ቲሺ ኦሊዲ ዪሊዳ ጊሾ ገብፄ ሻሉዋፔ ኣሊዲ ኪሪሰቶሳ ጊሾ ቦሬታናይሲ ዳር ኣዲያ ዲሬቴሊ ገዲዲይሳ ኤሪሰ።

27 ሙሴይ ካወዋ ሃንቁዋ ያዮና፣ ገብፄፌ ኬዲይይ ኣማኖና። ቤንቶና ያሳ ቤዒዳ ኣሳዳ ሃኒዲ ባ ቆፋን ጌንጨሰ። 28 ሃይቆ ኤሂያ ኪታንቾይ ኢሰራዔል ኣሳ ባይራ ናይታ ዋዶና ሜላ ሙሴይ ፋሲካኔ ሱላ ወርፄላ ዋጋ ኦሊዲይ ኣማኖና።

29 ኢሰራዔል ኣሳይ ሜላ ቢታራ ሃሙቲያዳ ሃሙቲዲ፣ ዘዮ ኣባ ፒኒዳይ ኣማኖና። ሺን ገብፄ ኣሳይ ጌላናው ፓጨ ቤዒሺን ሃላይ ኤንታ ሚቲሰ።

30 ኢሰራዔል ኣሳይ ኢያርኮ ካታማ ሹቻ ዲርሳ ላፑን ጋላሰ ዩዲዲ፣ ኩንዲሲዲይ ኣማኖና። 31 ላይሚያ ራዓባ ቢታ ዋቼይሳታ ዋኪዳ ጊሾ ከቲቶና ኣሳራ ሃይቆና ኣቲዳይ ኣማኖና።

32 ሂዛ፣ ሃራ ታ ኣይ ጎ? ጌዲዮናባ፣ ባራቃባ፣ ሳምሶናባ፣ ዮፍታሄባ፣ ዳዋቲባ፣ ሳሙዔላባ፣ ቃሲ ናቤታባ ኦዳናው ታው ዋዴይ ጊዴና። 33 ኤንቲ ኣማኖን ካዋቲላታ ያኒዶሶና፣ ዪሎቴላን ኣይሲዶሶና፣ ያሳይ ኣማና ገዳ ኡፋይሳ ኤኪዶሶና፣ ጋሞታ ዶና ጎርዲዶሶና፣ 34 ታማ ዋልቃ ቶይሲዶሶና፣ ሞርካታ ማሻፌ ኣቲዶሶና፣ ባንታ ዳቡራን ሚኒዶሶና፣ ኦላን ዋልቃማ ገዲዶሶና፣ ኣላጋ ቶራ ጎዲዶሶና። 35 ማጫሳቲ ባንታ ሃይቁዳይሳቲ ሃይቆፔ ፓዲን ኤኪዶሶና።

ቃሲ ሃራቲ ኣዲያ ሃይቆፔ ዴንዲዋ ኤካናው ኮዩዲ ቃሹዋፔ ቢሎታናይሳ ኢዲዶሶና። 36 ሃራቲ ኣሳን ቦሬቲዲ ሊሶን ጋራፌቲዶሶና፣ ሃራቲ ሳንላላታን ቃሹቲዲ ቃሾ ኬላን ዩጌቲዶሶና።

37 ኤንቲ ሱቻን ጫዴቲዶሶና፣ ማጋዘን ናምዓ ኬዩዲ ጳልቁቲዶሶና፣ ፓጨቲዶሶና፣ ማሻን ሃይቁዶሶና፣ ኤንታው ኡባባይ ቆዩን ሜቶቲዶሶና። ዶርሳ ኢቴኔ ዴሻ ኢቴ ማዒዲ ዩዩዶሶና።

11:24 ኬሳ 2:10-12 11:28 ኬሳ 12:21-30 11:29 ኬሳ 14:21-31
11:30 ኢያ 6:12-21 11:31 ኢያ 2:1-21፣ 6:22-25 11:32 ሃራ 6:11-8:32፣ 4:6-5:31፣ 13:2-16፣ 11:1-12፣ 1ሳሙ 16:1፣ 1ካዋ 2:11፣ 1ሳሙ 1:1-25 11:33 ዳኔ 6:1-27 11:34 ዳኔ 3:1-30 11:35 1ካዋ 17:17-24፣ 2ካዋ 4:25-37 11:36 1ካዋ 22:26-27፣ 2ታሪ 18:25-26፣ ኤር 20:2፣ 37:15፣ 38:6 11:37 2ታሪ 24:21

38 ኤንታው ሃ አላሜይ ገጎና ኢዲን ባዞ ቢታን፣ ዴሬ ቦላ፣ ጎንጎሎኒኔ ኦላ ገደን ዩዩደሶና።

39 ያሳይ ኤንታ አማኑዋባ ማርካቲኮካ፣ ሄ ኡባይ ጌቴቲዳ ኡፋይሳ ቃላ ኤኪቦኮና። 40 ያሳይ ኮሰ ሎዖባ ቆፒ ዋሊዳ ገሾ ኤንቲ ኮኒ ባይና ፖሎ ገደኮና።

12

ያሳይ ኮሰ አዋ

1 ሂዛ፣ ሻራዳ ኑ ዩሹዋን ዳሪዳ ሃይሳ ሜላ ማርካቲ ኑ ማታን ዴዒያ ገሾ ኑና ቋቢያ ኡባኔ ኦይኪዲ ሃሪያ ናጋራ ዲጊዲ፣ ኑ ሲንላን ዴዒያ ጋዴ ዋላ ጌንጫን ዋያሰ። 2 ኑ አማኑዋሰ ኦጌ ደዩዳይሳኔ ኑ ወርሴላ ፖሎዋኮ ኑና ጋሊያ ዩሱሳ ቦላ ኑ ኣይፊያ ዋሰሰ። ዩሱሲ ዋዴፔ ዴዒያ ኡፋይሳ ገሾ ማሰቃሊያ ዋያ ዳንዳዒዲ፣ ዩላ ሃይቁዋ ካዲዲ፣ ያሳፌ ኡሻቻ ባጋን ኡቲሰ።

3 ሂዛ፣ ሂንቲ ዶጪዲ ኡፋይሲ ቃንዖና ሜላ ናጋራንቸታ ኢፀዋ ዳንዳዒዲ ዩሱሳ ቆፒቴ። 4 ናጋራራ ዴዒያ ባዲያን ቡሮ ሱሉ ፕሳና ጋካናው ኤቁቲቤኬታ። 5 ያሳይ ባ ቃላን፣ ባ ናይታዳ ሂንቲና ዘሪዳይሳ ደገዴታ።

«ታ ናዓው፣ ያሳ ሴራ ሌቆፋ፤

ኢ ኔና ሴሪያ ዋዴ ኡፋይሲ ቃንዖፋ።

6 ጎዳይ ባ ዶሲያ ኡራ ሴሬሰ፤

ቃሲ ባ ናዓዳ ኤኪያ ኡባ ጋራፌሰ»

ያጌሰ። 7 ያሳይ ሂንቲና ባ ናይታዳ ሴሪያ ዋዴ ጌንጪቴ፤ አዋይ ሴሮና ናዒ ኦኔ? 8 ያሳይ ባ ናይታ ኡባ ሴሬሰ፤ ሂንቲ ሴሬቶና ኢዲኮ ቱማ ኢያ ናይታ ገደናሺን ባላኮ ናይታ። 9 ቃሲ ኑና ዩሊዳ ኑ አዋቲ ኑና ሴሮሶና፤ ኑካ ኤንታና ቦንቸሰ። ያቴን፣ ኮኒ ኑ ኣያና አዋሰ ዋኒዲ ኣሊ ሃሬቶኮ? 10 ሂዛ፣ ኑ አዋቲ ባንታው ሎዖ ዳኒዳ ሜላ ጉላ ዋዴሰ ኑና ሴሪዶሶና። ሺን ያሳይ ኑ ጎሳሰ፣ ኑ ኢያ ጌሻቴላን ሻኬታና ሜላ ሴሬሰ። 11 ኮኒ ሴሬቲያ ዋዴ ዩሎዩሲፔ ኣቲን ኡፋይሴና። ሺን ጉዬፔ ሴሬቴላ ሜዜቲዳ ኣሳሰ ሴራይ፣ ሳሮይ ኩሚዳ ዊሎቴላ ኣይፌ ኣይፊሴሰ።

ዘሬኔ ናጊሶ

12:5 እዮ 5:17፤ ለሚ 3:11-12

12 ሂዛ፡ ሂንቴ ኣርጋጨዳ ቁሲያኔ ሂንቴ ዳቡሪዳ ጉልባታ ሚንሊቴ። 13 ዋቤይ ፓፃና ማላፔ ኣቴን ኣሉ ማቆና ማላ ሂንቴ ቶሁዋስ ሱሬ ኦጌ ገሊሲቴ።

14 ኣሳ ኡባራ ሳር ዳናውኔ ጌሻቴላን ዳናው ሚኒቴ፤ ጌሻቴሉ ባይና ኦኒካ ጎዳ ቤዓናው ዳንዳዔና። 15 ሂንቴፊ ኦዴሰካ ፆሳ ኣቶ ከሃቴላይ ፓጮናዳ፡ ቃሲ ጫሞ ኣይፊ ኣይፊዲ ዳር ኣሳ ቴኒሲያኔ ቆይሲያ ዜሬላዳ ገደና ማላ ናጌቴቴ። 16 ሂንቴ ገደን ላይማቴያ ኣሲ ዋይኮ ኢሲ ቶሆ ሚያ ካላስ ባ ባይራቴላ ቶቺዲ ባይዚዳ ኤሳዌ ማላ ኣሲ ዳና ማላ ናጌቴቴ። 17 ጉዬፔ ኤሳዌይ ሄ ኣንጂዋ ኢካናው ኮዪዳ ዋዴ ዳጌቴዳይሳ ኤሬታ። ኢ ሄ ኣንጂዋ ኣፋላን ሚኒዲ ኮይኮካ፡ ዴማናው ዳንዳዒቤና፤ ኢ ናጋራፔ ሲማናው ቃዳ ዴሚቤና።

18 ሂንቴ ኩሼን ቦሼቴያ ሲና ዴሪያኮ፡ ኤዲያ ታማኮ፡ ቆማኮ፡ ጫጋናኮ፡ ጎቴያኮ፡ 19 ሞይዚያ ዋሱዋኮ ዋይኮ ቃላይ ሲዔቴያ ቤሳኮ ዪቤኬታ። ሄ ቃላ ሲዒዳ ኣሳይ ሃራ ጉዡ ቃላ ሲያና ማላ ዋሲዳሶና። 20 ኣይሰ ገኮ፡ «ሃሪ ኣቶሺን፡ ደዒ ሄ ዴሪያ ቦቺኮ፡ ሹቻን ጫዴቴዲ ሃይቆ» ያገዳ ኪታ ኤንቴ ቶካናው ዳንዳዒቦኮና። 21 ሄ ሃኒያባይ ዳር ዳጋንሉያባ ገዲዳ ገሾ ሙሴይ፡ «ታኒ ያሻን ኮኮራስ» ያገሰ።

22 ሺን ሂንቴ ዲዮኔ ዴሪያኮ፡ ዴዎ ፆሳይ ዴዒያ ዬሩሳላሜ ካታማኮ፡ ኢሲፊ ሺቂዲ ኡፋይቴያ ዳር ሙኩሉ ኪታንቸታኮ ሳሉዋ ዪዴታ። 23 ኤንታ ሱንሳይ ሳሎን ፃፊቴዳ ዋሳ ከላ ባይራ ናይታኮ፡ ኣሳ ኡባ ፐርዲያ ፆሳኮ፡ ፖሎ ገዲዳ ዲሎ ኣሳ ኣያናታኮ ዪዴታ። 24 ኦራላ ጫቁዋስ ገደ ገዲዲ ሲጌሉያ ዬሱሳኮ፡ ኣቤላ ሱላፊ ኣዲያባ ኦዲያ ዉርፃቴዳ ሱላኮ ዪዴታ።

25 ሂንቴው ኦዲያ ኡራ ቃላ ኢፃስ ጎና ማላ ናጌቴቴ። ካሴይሳቴ ሳዓን ገዲዲ ኦዲዳ ኪታ ሲያና ኢዲዲ ኣቴቦናባ ገዲኮ ያቴን፡ ሳሎን ገዲዲ ኦዲያ ቃላ ኦኒ ኢፃስ ገኮ ዋኒዲ ኣታኔ? 26 ሄ ዋዴ ኢያ ቃላይ ሳዓ ቃሉስ። ሺን ሃዒ ታኒ፡ «ሳዓ ፃላላ ገደናሺን ኢሲ ቶሆ ዛራዳ ሳሉዋካ ቃላና» ያገሰ። 27 «ኢሲ ቶሆ ዛራዳ» ገያ ቃላይ ቃዎናባይ ሚኒዲ ዳና ማላ ቃዲያ ማዴቴዳባቴ ቆያናይሳ ቤሴስ።

12:12 ኢሳ 35:3 12:13 ለሚ 4:26 12:15 ዛሬ 29:18 12:16 ሜዴ 25:29-34 12:17 ሜዴ 27:30-40 12:18 ዛሬ 4:11-12፤ 5:22-27፤ ኬሳ 19:16-22፤ 20:18-21 12:20 ኬሳ 19:12-13 12:21 ዛሬ 9:19
12:24 ሜዴ 4:10 12:25 ኬሳ 20:22 12:26 ሃጌ 2:6

28 ኑኒ ቃዓናው ዳንዳዖና ካዎቲላ ኤኪያ ጊሾ ያሳ ጋላቶሰ፤ ያሳ ኡፋይሲያ ኦጊን ቦንቸኒኔ ያሻቴላን ኢያ ጎይኖሰ። 29 ሂዛ፣ ኑ ያሳይ ቱማ ፀጊያ ታማ።

13

ወርሴላ ዞሪ

1 አማኒያ አሳዳ ኢሶይ ኢሱዋራ ፖሎ ሲቁቲቴ። 2 አማሌ ሞኬይሳ ዳጎፒቴ። ኢሲ ኢሲ አሳቲ ሄሳዳ ኦሊሹ ኤሮና ኪታንቸታ ሞኪደሶና። 3 ቃሾን ዴዔይሳታ ሂንቴካ ኤንታራ ኢሲፌ ቃሾን ዴዔያዳ ኦሊዲ ኤንታና ቆፒቴ። ዋዬ ኤኪያ አሳራ ኢሲፌ ሂንቴካ ዋዬ ኤኪያዳ ኦሊዲ ኤንታና ቆፒቴ።

4 ኤኮይኔ ጌሎይ አሳ ኡባ ማታን ቦንቸቲዳባ ጊዶ። ቃሲ ያሳይ ላይማቴይሳታኔ ላሚይሳታ ፒርዳናው ዴዔያ ጊሾ አዚናይኔ ማቸያ ኢሶይ ኢሱዋሰ አማኔታናው ቤሴሰ።

5 ሚሹ ሲቆፔ ሂንቴና ናጊቴ፤ ሂንቴው ዴዔያባን አሊቴ። ያሳይ፣ «ታኒ ኔና ኡባራካ ዩጊኬ ዎይኮ አጊኬ» ያጊሰ። 6 ሄሳ ጊሾ፣ ኑኒ አማኔቲዲ፣

«ጎዳይ ታና ማዴይሳ፤ ታ ያዩኬ፤ አሲ ታና አይ ኦላኔ?» ያጎሰ።

7 ያሳ ቃላ ኮይሮ ሂንቴው ኦዲዳ ሂንቴና ካሌሌይሳታ ቆፒቴ። ኤንቲ ዋኒዲ ዴዔዳኮ ኤንታ ዲሳ ቤዒዲ ኤንታ አማኑዋ ካሊቴ።

8 ዩሱሰ ኪሪሰቶሲ ዚኔካ ሃቸካ ሜሪናዉካ ላሜቴና። 9 ዲማ ዲማ ኦራላ ቲሚርቴን ሃራሶ ቢዲ ጳዮፒቴ፤ ቦፒቴ። ኑ ዎዛናይ ያሳ አጼ ኬሃቴላን ሚናናው ቤሴሰፔ አቲን ሚን ጎዖና ካላን ዎጋ ፖሎን ጊዶ።

10 ሺን ዲንካኒያ ጊዶን ኦሊያ ካሂኔቲ ሄ ያርሾ ካላፌ ማናው ኤንታው ማቲ ባይና ያርሾ ቤሳይ ኑሰ ዴዔሰ። 11 ካሂኔ ሃላቃይ ናጋራ ያርሾሰ ሜሄ ሱሊ ኤኪዲ ያርሻናው ኡባፌ ጌሻ ቤሳ ጌሌሰ። ሺን ሄ ሜሂያ አሹዋ ዲርሳፌ ካሬን ፀጊሰ። 12 ሄሳዳካ፣ ዩሱሰ ዴሪያ ናጋራፔ ባ ሱላን ጌሻናው ካታማ ፔንጊያፌ ካሬን ዋዬቲሰ። 13 ሂዛ፣ ኑኒ ቦሪያ ቶኪዲ ዲርሳፌ ካሬ ኢያኮ ኬዮሰ። 14 ሂዛ፣ ኑሰ ሃይሳን ሜሪናው ዴዔያ ካታሚ ባዋ፣ ሺን ኑኒ ያና ካታማ ናጎሰ።

12:29 ዛሬ 4:24 13:2 ሜዲ 18:1-8፤ 19:1-3 13:5 ዛሬ 31:6፣ 8፤ ኢያ 1:5 13:6 ማዝ 118:6 13:11 ለዌ 16:27

15 ሂዛ፣ ዩሱሳ ሳጋራ ኡባ ዎዴ ኢያ ሱንጻሰ ማርካቲያ ሜቴርሻ ጋላታ ያርሾ ያሳሰ አሞሰ። 16 ሎዎባ ኦሶኔ ሂንቴው ዴዒያባፔ ሜቶቲዲ ኣሳሰ ኢሞ ዶጎፒቴ። ሂዛ፣ ሄሳ ሜላ ያርሾይ ያሳ ኡፋይሴሰ።

17 ሂንቴና ካሌጼይሳታሰ ኪቴቴቴ፤ ኤንቴ ጊያባ ኦሊቴ። ኤንቴ ባንታ ኦሊያባሰ ያሳ ሲንጻን ኦይሼታናው ዴዒያ ጊሾ ሂንቴና ሄሞሶና። ሂንቴ ኤንታው ኪቴቴኮ፣ ባንታ ኦሱዋ ኡፋይቴዲ ኦጻና፤ ሄሲ ሃናና ኢደኮ፣ ኤንቴ ኣዛኒሼ ኦጻና፤ ሄሲ ሂንቴና ኣይቢባካ ማዴና።

18 ኑሰ ያሳ ዎሲቴ። ኑ ካሃይ ጌሺ፤ ኑ ኡባ ዎዴ ሎዎባ ኦጻናው ኮዮሰ። 19 ታኒ ሂንቴኮ ኤሌሳዲ ያና ሜላ ሂንቴ ታው ሚንሊዲ ያሳ ዎሳና ሜላ ታ ሂንቴና ሃዲራ ጋይሰ።

20 ሳሮቴጻ ያሳይ፣ ዶርሳ ሄሚያ ኑ ጎዲ ዩሱሳ፣ ባ ሜሪና ጫቆ ሱጻን ሃይቆፔ ዴንሊዲይሲ፣ 21 ኢያ ሼኒያ ኦጻና ሜላ ሎዎባ ኡባን ኢ ሂንቴና ዳንጪሶ። ኢያ ኡፋይሴሰያባ ዩሱሰ ኪሪሰቶሳ ሳጋራ ኑናን ያሳይ ኦጻ። ዩሱሰ ኪሪሰቶሳ ሳጋራ ያሳሰ ሜሪናፔ ሜሪና ጋካናው ቦንቾይ ጊዶ። ኣሚንዒ።

22 ታ ኢሻቶ፣ ታ ሃ ዳብዳቢያ ሂንቴው ቃንጻን ፃዕዲ ጊሾ ሂንቴ ታ ዞሪያ ሳሌቶና ኤካና ሜላ ታ ሂንቴና ዎሳይሰ።

23 ኑ ኢሻይ፣ ፂሞቲዮሲ ቃሾፔ ቢሌቴዲይሳ ኤሪቴ። ኢ ኤሌሲዲ ታኮ ዪኮ ታ ኢያራ ሂንቴና ባዲ ቤዓና።

24 ሂንቴና ካሌጼይሳታኔ ኣሚኒያ ኡባ ሳሮ ጊቴ። ፃሌፔ ዪዲ ኣሚኒያ ኣሳይ ሂንቴና ሳሮ ያጎሶና።

25 ያሳ ኣጼ ከሃቴጻይ ሂንቴ ኡባራ ጊዶ። ኣሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022
c35d6c73-3843-5482-b53e-7559d35deee5